

韓大中丞奏議

韓大中丞奏議

受業

丁善慶

編次

桑春榮

次孫泰 華敬錄

卷之十一

目錄

拏獲會匪首要各犯疏

附片

請知府畱省另補疏

查辦永新縣歷任挪墊無着民欠疏

設船緝匪以安行旅疏

照例分賠庫項疏

校閱營伍疏

審辦已革武生陳應麟京控疏

查閱贛州九江兩鎮營伍疏

審擬定南廳民吳杰甫京控疏

請 旨酌改知縣通判疏

動欸代造直隸二限撥船疏

請 陞見疏

查明更正疏

拏獲販私拒捕要犯疏

遵 旨傳詢疏

動欸代造直隸三限撥船疏

分賠歸欸疏

審擬圖產害命要犯疏

據情奏懇疏

拏獲會匪首要各犯疏

奏為會匪案內首要各犯均已就獲遵

旨嚴訊按律定擬恭摺仰祈

聖鑒事竊臣前與藩臬兩司風聞贛州道府訪獲會

匪未據稟報派員前往會督查拏旋據稟獲要  
犯黃百幅等並起獲木印等件因贛郡距省較  
遠犯證衆多飭令臬司興科前往查辦

奏奉

上諭務將在逃夥黨購線密拏並嚴訊該犯等木印作何行用黃百幅因何有安遠公名號是否係該犯自稱抑有首犯給與其餘夥黨有無稱號及聚衆滋事等情務令水落石出查拏淨盡早絕根株毋許一名漏網等因欽此遵卽恭錄轉行欽遵辦理並先准督臣蔣攸銑訪聞咨會飭拏續據稟獲張貴等先後共獲犯八十二名於各犯家內逐一搜查並無違悖字跡惟於張貴家牆穴內

起出張貴守備職銜札付一張首列安遠公前  
威勝將軍黃中營副總府鍾偽銜札尾有周四  
年字樣經臬司會督該道府等提犯研訊究出  
安遠公卽係黃百幅將軍係黃沅瀧副總府係  
鍾心瀧均係自稱名號並無另有首犯給與因  
該犯等已故之師毛元奇有師祖流傳符書一  
本交黃百幅收存內載札付式樣有招集人才  
等句並周四年等字註明順天天運年號屢經



查禁改用周字取天運周流之意不知四年係  
在何時亦不知毛元奇師祖係何姓名黃百幅  
起意與黃沅瀧鍾心瀧商允雇黃明佳照刊札  
付刷印填給張貴守備職銜一張因奉訪拏卽  
將刊板並符書本等件燒燬至長方木戳一顆  
刻萬大哥行令五字三角木戳一顆刻同心協  
力四字均在花帖上盖用嚴究並無聚衆滋事  
別情該臬司於取供後回省並將緊要各犯分

起解省飭委署南昌府經額布等先提黃百幅  
令將札付照寫與所填筆跡相符及試以文義  
未能講解訊供解審前來臣查各木戳及花帖  
所載均核與歷辦會匪各案相同惟填用札付  
恐該犯等另有不法重情必須澈底跟究盡絕  
根株隨提各犯督同藩司繼昌臬司興科逐一  
隔別研鞫緣黃百幅籍隸信豐縣係在安遠地  
方生育小名安遠仔測字度日先於道光二年

九月與同縣已獲之黃沅瀧鍾心瀧張北斗及在逃之黃二狗於南康地方會遇素識已故之上猶縣人毛元奇告知係添弟會卽三點會內人誘令拜師入會可免外人欺侮如肯多給錢文領受花帖卽可自行傳徒黃百幅等允從初九日毛元奇買備香燭設立從前傳會之萬提喜卽洪二和尚牌位用布搭橋令黃百幅等鑽過毛元奇口念有忠有義橋下過無忠無義劍

下亡俚語宰鷄取血滴酒同飲傳授開口不離  
本出手不離三並三八二十一暗藏洪字口訣  
黃百幅鍾心瀧各送給錢八百文均給有花帖  
餘因錢少未給花帖旋因毛元奇另傳徒弟王  
貞才犯案緝拏毛元奇當將傳徒長方三角木  
戳二顆同符書一本交黃百幅收存黃百幅曾  
向毛元奇問知係伊師祖流傳當同花帖等件  
密藏與毛元奇等各自逃避嗣於七年五月事

冷潛回黃百幅貧苦難度起意傳徒五月十三  
日在信豐地方誘令黃翔罄等十八人入會拜  
伊為師仍照前式鑽橋飲酒傳授口訣黃翔罄  
黃觀受及在逃之黃書汶黃二生四人領受花  
帖黃纍組保葉二罄孜黃泰傑黃閏狗黃嘑孜  
黃冠陰孜葉良竈黃創成黃閏妹黃泰貴及在  
逃之陳狗孜鍾觀瀧黃炳孜十三人均未領受  
花帖黃罄受僅傳口訣各給錢二三百至八九

百文不等鍾心瀧亦於五月十三日在信豐地方誘張貴等七人入會拜伊為師張貴領受花帖胡光孜鍾堤孜廖石幅曾華憫黃言洪及在逃之鄧細孜均鑽橋傳訣未曾飲酒亦未領受花帖張貴旋於五月二十日在信豐地方轉誘黃地辛保盧五仔羅丙瀧入會鑽橋飲酒拜伊為師黃地辛保領受花帖餘因錢少未給花帖六月內黃百幅因傳徒無多會內花帖習見難

以哄誘憶及毛元奇交存符書本內載有札付  
式樣可以惑衆起意照刊填寫給假官名號多騙  
錢文與黃沅瀧鍾心瀧商允三人合夥騙錢均  
分黃百幅小名安遠仔卽稱為安遠公黃沅瀧  
小名威勝總理會事稱為威勝將軍鍾心瀧副  
理會事稱為中營副總府黃百幅當照符書本  
所載札付錄出填寫偽銜雇不諳文義之黃明  
佳來家刻板並刊偽銜戳記蓋於札尾當經鍾

心瀧向張貴告知引誘買札張貴給錢三千五百文填給守備職銜札付一張黃纍組保亦欲向買因措錢不出尚未填給卽經文武各官訪拏黃百幅畏懼將刊板戳記符書本等件概行燒燬花帖木戳先藏鍾心瀧家張貴札付藏於牆穴均不及燬丟各自逃匿此黃百幅等始則結會傳徒繼復刊刷札付妄稱名號冀圖騙錢之實在情形也又籍隸信豐縣之陳土養與原



籍安遠縣寄居定南廳之郭文瀾並信豐縣人  
葉沅胡劉泰霄定南廳人練賤妹及在逃之張  
書太與黃百幅等並非同夥均於道光六年七  
月十九日在定南廳地方拜三點會內已故之  
溫塊老為師鑽橋飲酒傳授口訣陳土養郭文  
瀾各給錢八百文均受花帖餘未領帖陳土養  
旋於七年六月十八日在龍南與信豐交界之  
龍口地方轉誘郭中魁等三十三人入會拜伊

為師郭中魁劉瀧標張維城及在逃之曹三珠  
郭洪吉郭汶沛六人均得花帖邱亨翔劉猴孜  
二人鑽橋飲酒劉紹旦劉年狗孜賴老滿劉汶  
學張奇芳劉斗孜劉新牯孜季保魁李見德劉  
炳瀧謝貴米仔郭經銘李癸瀧孜劉東升及在  
逃之呂成仔十五人俱各鑽橋並未飲酒領帖  
謝乙受孜黃二孜王以廷劉已受孜黃普翔保  
鍾土煥生黃冠陰保黃辛年保張朝陽謝學誠

十人僅傳口訣各給錢二三百至八九百文不  
等郭文瀾亦於七年六月十三日在信豐地方  
誘令郭汶奇等二十六人入會拜伊為師郭汶  
奇郭經理郭崇輝陳老七朱茂貴及在逃之黃  
明勝胡義賢七人鑽橋飲酒傳授口訣練長閏  
郭汶江郭物貴郭言瀧王重懷練千長袁萬太  
袁幘盛曾半邊蘇劉西佐及在逃之余登仕余  
節軒戴井仔十三人鑽橋傳訣並未飲酒郭沅

吉顧崇秀余已受孜許長受孜余四十一練滿  
瀧六人止傳口訣均未領有花帖各給錢二三  
百至八九百文不等此陳土養郭文瀾各自結  
會傳徒之原委也旋經地方文武各官派委員  
弁兵役並曉諭紳士探引緝拏將首要各犯先  
後獲解審悉前情臣復提黃百幅再三嚴詰堅  
供實止圖騙多錢照流傳符書本內所載札付  
式樣刊刷填給職銜妄自稱為安遠公等名號

如果另有首犯給與豈有不於札內列入至札付實止填給張貴一紙正在誑騙卽被訪拏委無聚衆謀為不法別情加以刑嚇矢口不移檢查該道府稟報黃百幅與黃沅瀧等係先後獲案各供如一並據傳訊各該犯族隣人等僉供並無悖逆情事似無遁飾查律載謀叛已行但共謀者不分首從皆斬知已行而不首者杖一百流三千里又律載左道異端煽惑人民為首

者絞監候又例載傳習白陽等邪教習念荒誕  
不經咒語拜師傳徒惑衆者為首擬絞立決為  
從發回城給大小伯克及力能管束之回子為  
奴各等語此案黃百幅本係傳徒會匪膽敢自  
稱為公刊刷札付填給張貴守備職銜實屬不  
法雖札付底稿年號得自流傳該犯僅圖騙錢  
並無謀為不軌情事但既妄稱名號填用札付  
形同謀叛自應比例問擬訊係黃百幅起意黃

百幅應比照謀叛已行斬律擬斬立決仍梟首  
傳示犯事地方以昭炯戒黃沅瀧鍾心瀧妄稱  
將軍副總府於札付內聽從列名卽屬為首黃  
沅瀧鍾心瀧均請比照謀叛已行不分首從皆  
斬律擬斬立決俱已監斃應毋庸議案係比照  
問擬照例免其緣坐張貴得受札付先未預謀  
由於鍾心瀧引誘所致與實在為從有間其傳  
徒已給花帖應與各自給帖傳徒之陳土養各

照傳習白陽等邪教習念荒誕不經咒語拜師  
傳徒惑衆者為首絞決例均擬絞立決郭文瀾  
傳徒未給花帖應照左道異端煽惑人民為首  
律擬絞監候陳土養郭文瀾均已監斃應毋庸  
議張北斗葉沅胡劉泰霄練賤妹黃翔罄黃觀  
受黃纍組保葉二罄孜黃泰傑黃閏狗黃嘑孜  
黃冠陰孜葉良竈黃創成黃閏妹黃泰貴黃地  
辛保盧五仔羅丙瀧郭中魁劉瀧標張維城邱



亨翔劉猴子郭汶奇郭經理郭崇輝陳老七朱  
茂貴二十九名均係鑽橋飲酒或領有花帖尚  
未傳徒均照邪教為從例發回城給大小伯克  
及力能管束之回子為奴練賤妹黃觀受黃閏  
妹黃泰貴黃地辛保張維城邱亨翔郭汶奇已  
在監在途病故應毋庸議黃明佳因不諳文義  
誤為刊刻札付應比照謀叛知情不首律杖一  
百流三千里胡光孜鍾提孜廖石幅曾華憫黃

言洪劉紹旦劉年狗孜賴老滿劉汶學張奇芳  
劉斗孜劉新牯孜季保魁李見德劉炳瀧謝貴  
米孜郭經銘李癸瀧孜劉東升練長閏郭汶江  
郭物貴郭言瀧王重懷練千長袁萬太袁惆盛  
曾半邊蘇劉西佐二十九名均僅止鑽橋傳訣  
未飲血酒亦未領帖若照邪教為從罪上減一  
等擬徒與僅受口訣者漫無區別應於徒罪上  
加一等各擬杖一百流二千里黃明佳黃言洪

練長閨郭汶江郭物貴郭言瀧王重懷練千長  
已在監在途病斃應毋庸議黃罄受謝乙受孜  
黃二孜王以廷劉已受孜黃普翔保鍾土煥生  
黃冠陰保黃辛年保張朝陽謝學誠郭沅吉顧  
崇秀余已受孜許長受孜余四十一練滿瀧十  
七名均止傳授口訣且係逼脅入會情節較輕  
應各擬杖一百徒三年謝學誠練滿瀧業已提  
禁身故應毋庸議餘各到配折責分別安置札

付底稿傳自何人無從追究起獲木戳花帖札  
付案結銷燬毛元奇溫塊老傳徒給帖均罪應  
絞決查明均已身故應毋庸議逸犯黃二狗等  
飭緝務獲另結除將全案供招咨部外謹會同  
大學士兩江總督臣蔣攸銑合詞恭摺具  
奏伏乞

皇上聖鑒勅部核覆施行奉

硃批另有旨

附片

再定例姦民倡設邪教惑眾歛錢該管各官如  
能訪出迅速查辦功過相抵免其從前失察處  
分等因今會匪黃百幅等一案該地方文武均  
有失察處分惟於臣等未經訪聞之先業經獲  
犯多名後又懸立重賞分派督率將案內首要  
各犯全行弋獲尚知愧奮功過似足相抵可否

仰懇

聖恩俯准將歷任文武各官應得處分一並寬免之處出自

逾格鴻施又臣派委南昌府同知候補知府陳煦同知銜臨江府通判徐澂南昌城守營守備李步月前往查辦該員等會督地方文武不辭勞瘁不動聲色於一月之內續獲匪犯六十餘名辦理尚為妥速查陳煦係候補知府徐澂係同知銜通判職分較大不敢仰邀議叙守備李步月

本係應陞之員亦無庸再予鼓勵此外尚有隨同查辦之文武員弁及探引緝拏之地方紳士現已行令兩司確加查核將員弁分別超委記功紳士給匾示獎合並附片

奏

聞奉

硃批另有旨內閣奉

上諭韓文綺奏審擬會匪案內首要各犯一摺着刑

部速議具奏此案黃沅瀧鍾心瀧均罪應斬決此等要犯自應明正刑誅因何俱令其監斃是否該犯等畏罪自盡抑係地方官詭避處分縱令禁役人等凌虐致斃此時姑免其深究嗣後各直省督撫遇有此等要犯務須飭屬嚴行羈禁小心防守毋得鬆放刑具致有疎虞重干咎戾將此通諭知之又另片奏此案失察各員例有處分惟現將首要各犯全獲功過尚足相抵着加恩將歷任文武



各官應得處分一並寬免餘着照所奏辦理

請知府畱省另補疏

奏為知府人地未宜請

旨畱省另補恭摺仰祈

聖鑒事竊照贛州府知府楊樹基前因會匪一案雖  
經獲犯辦理究屬遲鈍奏明撤任欽奉

上諭韓文綺另片奏贛州府知府楊樹基雖督率會  
匪多名辦理究屬遲鈍等語楊樹基著卽撤任仍  
責令緝拏逸犯俟定案時分別核辦其贛州府知

府卽着陳煦署理等因欽此欽遵在案查楊樹基  
先經獲有會匪因犯供狡展未卽稟報尚非無  
故遲延該府自撤任後親赴各處會同委員及  
地方文武不遺餘力購線搜拏業將案內首要  
各犯全行就獲其平日操守廉潔辦事黽勉亦  
無貽誤惟於贛郡人地不甚相宜未便仍令回  
任應請將楊樹基留於江西遇有相當知府缺  
出另行酌量

奏請補用所遺贛州府知府係衝繁疲難四項兼  
全要缺相應請

旨簡放以重職守臣等往返札商並詢之藩臬兩司  
意見相同謹合詞恭摺具

奏伏乞

皇上聖鑒訓示奉

硃批另有旨內閣奉

上諭蔣攸銛等奏知府人地未宜一摺江西撤任贛

州府知府楊樹基於該郡不甚相宜着畱於該省  
遇有相當知府缺出另行奏補所遺員缺着陳煦  
補授該部知道

查辦永新縣歷任挪墊無着民欠疏

奏為查出永新縣歷任挪墊無着民欠酌擬追賠  
歸款仰祈

聖鑒事竊照州縣經徵錢漕自應年清年款不容絲  
毫挪掩前因永新縣知縣徐作楷革職離任經  
陞任藩司嵩溥飭令該管前任吉安府知府銘  
恩督同接任知縣張澍將該革員經手倉庫錢  
糧按款交接查有前任知縣侯資燦郭元揆李

衢任之楷宋大寅阿應麟楊齊元葉蘭祝慶譽  
各任內將民欠協濟屯餘兵加漕米挪項墊解  
流交作抵除陸續催追還欸外尚有實在無着  
銀二萬三千四百四十七兩零迨徐作楷到任  
後仍復遞年墊解以致挪缺嘉慶二十四年隨  
漕正耗銀五百五十兩零二十五年丁耗銀四  
千二百四十七兩零隨漕正耗銀一千五十四  
兩零道光元年丁耗銀五千五百七十八兩零

隨漕正耗銀八百三十四兩零屯糧正耗銀二百八十五兩零二年丁耗銀三千五百七十兩零隨漕正耗銀五百四十八兩零餘租銀六百六十六兩零存留銀六十三兩零三年丁耗銀四千二百五十三兩零餘租銀二十七兩零四年丁耗銀一千八十五兩零隨漕正耗銀六百八十二兩零共銀二萬三千四百四十七兩零吊查各年徵冊流串逐一滾算民欠銀數相符



並無以完作欠影射侵欺情弊原欠花戶多已  
將業轉賣逃亡故絕無可着追並郭元揆楊齊  
元明秀祝慶譽徐作楷各任尚共短交捐雜各  
款銀三千九百八十七兩零由該管道府揭報  
到司據布政使繼昌會同按察使興科護糧道  
事南昌府知府李本榆酌議追賠歸款具詳請  
奏前來臣查永新縣歷任各員於無着民欠不早  
設法清釐又不據實揭報以致輾轉挪墊遞相

交抵律以虛出通關及挪移出納之條固屬咎  
所應得惟是民欠委無捏飾挪墊尚屬因公事  
在欽奉

諭旨禁革官墊名目以前可否仰懇

皇上格外

天恩俯念官非一任事閱多年從寬暫免治罪准其  
勒限追賠歸欵如蒙

俞允所有前項挪缺銀二萬三千四百四十七兩零

應請先於歷任經徵挪抵各員名下按在任月日追賠數在一千兩以上者限六個月一千兩以下者限三個月在江之員以奉

旨之日起限離江人員以咨明旗籍准咨之日起限逾限不完現任人員革職治罪叅革病故人員照例知府分賠五成巡道藩司各分賠三成巡撫分賠一成其短交捐雜各款銀三千九百八十七兩零亦均係應解之項原欠各員率多叅

草病故無可追繳若責令現任攤補又啟挪移  
之漸應同挪缺正項一並於各上司名下分賠  
庶欸項悉歸有着倘經此次查辦之後再有不  
實力催徵仍任疲頑之戶拖欠及捏報挪掩卽  
照例嚴行叅辦除各員追賠銀數俟奉

旨後另行造冊分咨外理合恭摺具

奏伏乞

皇上聖鑒訓示奉

硃批另有旨內閣奉

上諭韓文綺奏查出永新縣歷任挪墊無着民欠酌  
擬追賠歸款一摺江西永新縣歷任各員於無着  
民欠不早設法清釐又不據實揭報以致輾轉挪  
墊遞相交抵本屬咎有應得但念官非一任事閱  
多年姑着從寬免議治罪所有前項挪缺銀二萬  
三千四百四十七兩零着於歷任經徵挪抵各員  
名下按在任日月追賠數在一千兩以上者限六

個月一千兩以下者限三個月在省之員以奉旨之日起限離省人員以咨明旗籍准咨之日起限逾限不完現任人員革職治罪叅革病故人員照例知府分賠五成巡道藩司各分賠二成巡撫分賠一成其短交捐雜各欸銀三千九百八十七兩零亦均係應解之項原欠各員率多叅革病故無可追繳若責令現任攤補又啟挪移之漸着一並於各上司名下分賠歸欸倘經此次查辦之後再

有不實力催繳仍任疲頑之戶拖欠及捏報挪掩  
着卽嚴叅懲處不貸該部知道

設船緝匪以安行旅疏

奏為動支不報撥閒欸銀兩設船緝匪以安行旅  
恭摺仰祈

聖鑒事竊照江西濱江帶湖南自南贛由吉安臨江  
南昌等府以達九江東北由鄱陽湖直抵饒州  
為數省通衢樁帆絡繹每有匪類駕盪小船伺  
便滋擾節經議設章程派委巡緝嗣於道光三  
年前撫臣程含章以匪徒為害冬令尤為緊要



議於每年十月起至次年正月止由省派員分段巡查所需經費

奏明在於鹽務充公項下提給報銷歷年動支銀三千數百兩不等惟未巡各月仍有沿河搶詐劫竊之案雖節經嚴拏懲辦商旅已先受其累伏查匪徒出沒原屬無常而設法巡防尤貴經久臣與督臣蔣攸銛熟商應將舊定巡河章程量為變通另立巡船按縣長年派委員弁帶同

兵役校織巡查並由省派員幫緝庶防範更為  
周密卽於上冬試辦第需用經費較多若責令  
各該縣按年捐備力有不逮飭據司道議詳江  
省曾於乾隆五十一年挈獲匪船十六隻

奏改巡船撥給南昌新建豐城清江餘干五縣緝  
匪歷時已久不堪駕駛請將此項船隻變價充  
公另設堅固巡船四十隻自省城起上至贛州  
下達饒州所屬之餘干縣止按照地方險要道

路遠近上下梭巡每船估計造費銀八十兩共  
需銀三千二百兩查有藩庫報部間欸內義寧  
州寺產租息一項原係發給巡船工食及營船  
修費之用並不報撥現在節年積存銀三千三  
百兩零應請動支作為添造巡船之費每年修  
艖等項卽責成各該縣自行辦理毋庸再請開  
銷至長年巡費除南昌廬陵鄱陽三縣缺分較  
優由該縣等自行籌給並派委實缺員弁原有

廉俸亦毋庸再給巡費外其餘試用委員及水  
手巡查各兵役均照舊核給薪水飯食每年共  
需經費銀九千六百餘兩此外尚有獲犯犒賞  
之用亦需籌備贛南道自願每年捐廉三千兩  
糧鹽二道各愿捐廉一千兩其餘不敷銀兩請  
於鹽務公費項下動支等情臣查巡船必須堅  
固應如所議動支建造至試用委員薪水及水  
手兵役口食每年共需銀九千六百餘兩另再

備銀一千兩以作獲犯犒賞之用除糧鹽並贛  
南各道每年共捐銀五千兩餘照前撫臣程含  
章原奏每年請於鹽務公費項下動支銀五千  
六百兩其委員兵役勸懲仍照舊章辦理如此  
改為長年巡緝經費既充緝捕必力漸可河道  
肅清以冀仰副

聖主靖匪安良之至意謹會同大學士兩江總督臣  
蔣攸銑恭摺具

奏伏乞

皇上聖鑒奉

硃批另有旨內閣奉

上諭韓文綺奏動支間欸銀兩設船緝匪一摺江西  
南贛等府每有匪徒出沒現經該督撫將舊定章  
程量為變通另立巡船按縣長年派委員弁校織  
巡查所用巡船請將乾隆五十一年撥給南昌等  
五縣船隻變價充公另設堅固巡船四十隻自省

城起上至贛州下達饒州所屬之餘干縣止上下  
梭巡每船估造費銀八十兩共需銀三千二百兩  
查有藩庫報部間欸內義寧州寺產租息一項原  
係發給巡船工食及營船修費之用並不報撥現  
在節年積存銀三千三百兩零着准其動支建造  
其試用委員薪水等項每年共需銀九千六百餘  
兩另備犒賞銀一千兩除糧鹽並贛南各道每年  
共捐銀五千兩外着每年於鹽務公費項下動支

銀五千六百兩以備支用嗣後該撫務當按照新定章程督飭所屬認真巡緝實力奉公勿致日久生懈如有巡緝不力之員卽着隨時嚴叅懲辦該部知道



照例分賠庫項疏

奏為挪移庫項人員監追限滿無完應照例分別  
歸款恭摺仰祈

聖鑒事竊照前任瑞昌縣緣事叅革知縣汪世鍾因  
霉變倉穀並沉失批解錢糧挪移徵存庫項賠  
解經前撫臣瑞 照例咨部挈問由前撫臣毓  
岱審明該革員挪移庫項除查封寓所衣物原  
籍家產變抵外實未完銀四千一百餘兩依挪

移庫銀五千兩以下例擬徒事在

赦前奏經部議欽奉

諭旨汪世鍾應得徒罪准其援免未完銀兩仍勒限  
監追限滿有無完繳再行分別辦理等因欽此轉  
行欽遵在案今據布政使繼昌按察使興科會  
詳稱該革員汪世鍾原挪庫銀四千二百八十  
七兩零內除查封省寓任所衣物及原籍產業  
共估抵銀一百四十兩零實未完銀四千一百

四十七兩零業已監追限滿歷過江西各任所  
並原籍均查無資財隱寄委係赤貧如洗無從  
追繳將未完銀兩酌擬分賠造冊呈送前來臣  
查該革員汪世鍾挪移庫項未完銀兩既據查  
明委係家產淨盡無可追繳自應着落該管各  
上司照例分賠巡撫賠十分之一銀四百一十  
四兩零藩司巡道各賠十分之二銀一千六百  
五十八兩零知府賠十分之五銀二千七十三

兩零分別追繳以清

帑項除分賠細數清冊另行咨部外理合恭摺具  
奏伏乞

皇上聖鑒勅部核覆施行奉

硃批該部議奏

校閱營伍疏

奏為校閱省標營伍並定期往看贛標及瑞州各營緣由恭摺仰祈

聖鑒事竊臣蒙

恩簡任封圻兼銜提督訓練營伍最為緊要屢經移行九江贛州兩鎮並各協營實力操演茲將南昌城守協及臣標左右兩營悉心校閱陣式整齊槍砲聯絡籐牌各技奮迅便捷將備以下各

官按名考驗悉皆強壯騎射均尚可觀兵丁並  
無老弱充數馬步六矢中四五矢者不少間有  
中六矢者弓自六力至十二力不等烏槍中靶  
亦在六七分軍械鮮利馬匹臚壯臣於技藝較  
優各弁兵分別獎賞內有軟弱生疎者亦卽嚴  
懲勒限練習務使一律嫻熟以冀仰副

聖上整飭戎行之至意江省現無緊要事件臣於本  
月十三日自省起程前往瑞州臨江吉安萬安

贛州一帶查閱營伍所有臣署日行事件飭委  
藩司代行遇有緊要者遞送途次核辦臬司招  
解各案先由藩司代審俟臣旋省核

題不致稍有延誤理合恭摺具

奏伏乞

皇上聖鑒奉

硃批知道了

審辨已革武生陳應麟京控疏

奏為遵

旨嚴審衆證明白犯供狡展循例定擬仰請

定奪恭祈

聖鑒事竊據安仁縣已革武生陳應麟遣抱告劉紹

華赴步軍統領衙門列款呈控該縣陳天爵一

案奏奉

諭旨此案着交韓文綺親提人證卷宗秉公嚴審確



情毋稍徇按律定擬具奏欽此並准刑部將劉  
紹華咨解到江當卽飭提人卷到省委員訊供  
該縣陳天爵與證佐人等僉稱陳應麟包漕鬧  
堂挾嫌妄控陳應麟仍執原詞恐有瞻徇串匿  
情弊當將該縣陳天爵叅奉

諭旨解任質審茲據委員提集嚴審衆供明白惟陳  
應麟堅不承招由藩司繼昌臬司興科會訊詳  
解前來臣細核各卷親提犯證隔別研鞫緣陳

應麟係安仁縣學武生有應完本戶漕米一石  
道光五年十月間該縣開倉收漕陳應麟包攬  
林光孫等三十三戶計米二十一石六斗零每  
石折收錢五千五百文陳應麟照額買米餘錢  
四十九千零十一月十六日陳應麟先將本戶  
漕米一石運倉完納另將包攬各戶由單赴倉  
核筭經漕書邱為高查非陳應麟的戶向其盤  
詰陳應麟棄單跑走邱為高稟縣將陳應麟武

生詳草差拘避匿六年二月初七日陳應麟路  
遇已故素好之葉添華家進內探望適武舉潘  
廷標先已在彼葉添華一同留欸均醉陳應麟  
稱欲赴縣完米邀潘廷標作伴同行未將包攬  
情事告知一同闖入宅門陳應麟令門丁劉八  
臬官開倉收米不允向劉八混罵潘廷標在旁  
勸解該縣陳天爵聽聞坐堂查訊呵斥陳應麟  
不服咆哮公堂扯倒公案當將陳應麟潘廷標

分別禁管稟解饒州府札委鄱陽縣訊供通詳  
陳應麟卽以挾讐誣辦等情先後赴司及臣衙  
門呈控批府審擬解司提訊犯供翻異發回該  
府覆審明確並據陳應麟具有親筆供單解司  
訊認無異尚未核詳陳應麟因先於道光四年  
十月漕書吳毓蘭等在倉收漕有花戶段光奎  
等搶先完米爭鬧擠壞衣帽並將收米底簿挨  
落一本嗣查係黃騰龍檢獲吳毓蘭等恐官查

責央陳應麟董飛鶴向陳覺俚借錢十九千賠  
還段光奎衣帽並為各花戶置酒和臉將簿取  
還陳應麟卽指為該縣浮收印簿被搶贖回並  
將借給錢文之陳覺俚指為包漕抵收貸項臚  
列各款做就呈詞逼令妻舅劉紹華赴步軍統  
領衙門呈控奏奉

諭旨交臣審辦查陳應麟所控陳天爵嘉慶二十五  
年八月中旬誕孫派捐唱戲開筵一節竅關重

大其詞內未據指定日期詰據陳應麟供稱有該學詳草廩生鄒魯案內指有唱戲日期可憑卷查嘉慶二十五年八月據安仁縣教諭李日官等以廩生鄒魯母喪未滿公然頂帽在縣衙門看戲等情詳草旋經提府委審緣八月十二日丁憂廩生鄒魯同職員劉碧照赴縣完糧劉碧照因聞母病趕回延醫將頂帽布套脫交鄒魯帶回鄒魯候給串票攜同衣帽出署適署外

居民演戲酬神縣學門斗程吉走至瞥見心疑  
鄒魯釋服從吉稟學詳革斷將程吉問擬重杖  
鄒魯原革廩生開復詳結伏查嘉慶二十五年  
奉文停止作樂於八月十一日到省由司府轉  
行該縣於八月十六日始行奉到訊據陳天爵  
堅供並無生孫派捐演戲開筵之事卽居民演  
戲亦在八月十六日以前行據饒州府查稟無  
異詰訊陳應麟此外無可指證餘如所控誣監

生楊茂泰之姦勒銀五百兩剪生員周作人之髮受穀二千石一節控涉賊私均應確究訊據陳天爵供稱楊茂泰因與陳卓立爭買教學文房屋控縣傳訊教學文嫁母馮氏後夫段子兒等混指楊茂泰與馮氏有姦楊茂泰之母徐氏隨以誣姦斷罰控府委審旋據徐氏以妄控斷罰呈明並究明楊茂泰與馮氏並無姦情爭買之屋楊茂泰成契在前斷歸楊茂泰承買詳結



周作人因往邀姚矮子短工有姚矮子同居之  
王閔氏素患痰迷妄指周作人強姦姚矮子之  
妻胡氏剪有髮辨告知其子王興兆控縣拘訊  
卽據王興兆查係伊母痰迷妄指呈首經該縣  
訊明完案並無勒受銀穀情事楊茂泰業已身  
故提訊周作人並陳應麟所指過付徐覲堂徐  
步高僉稱並無其事詰訊陳應麟據稱罰楊茂  
泰銀兩係楊茂泰之母徐氏自行呈控受周作

入穀石得自傳聞此外並無確據又如所控該縣一捐積穀三派壽資道光二年三月又稱壽期捐資筵宴五年十一月縣仍帖召紳耆派捐賀資伊與武生易振聲等稟乞寬期釘恨捏詳各情一節訊據陳天爵供稱道光四年奉文清查缺穀因有接收歷任盤折缺穀二千四百石零於五年買補上倉具報有案並非派捐民穀亦無三派壽資及稱壽捐資筵宴之事惟道光

五年十一月間有生員萬里鵬等因該縣蒞任  
七載勤理詞訟士民感戴將屆該縣六旬生辰  
欲為掛匾經該縣查知飭止萬里鵬等因已做  
就民之父母匾額於六年正月間將匾懸掛縣  
堂委非帖召派捐亦無易振聲等遞過寬期稟  
詞質之萬里鵬等僉供無異詰訊陳應麟供稱  
派捐積穀不能指證三派壽資有縣堂懸掛匾  
額及壯役桂輝分送請帖可憑嚴究桂輝堅供

該縣並無派令散帖請酒因與陳應麟平日口角有嫌係被扳累他如所控該縣新設女班房為丁役宣淫之所巧結土光棍作黨援漁利之媒各情飭據委員訪查並無其事當令陳應麟將女班房設在何處究係何案婦女被押被淫光棍係何姓名逐一指出提究據稱得自風聞不能供指姓名憑據臣查陳應麟包漕鬧堂有被攬花戶林光孫等及武舉潘廷標可證且先

經饒州府復訊陳應麟均已承認寫有親筆供  
詞該縣陳天爵並無浮收其孫陳世昌先於道  
光三年回籍並無與段光奎等爭鬧均據段光  
奎等確切供明其餘所控各情逐款研訊亦全  
屬虛誣臣恐尚有串避別情再三嚴究不特官  
吏人等堅供不移卽周作人等係陳應麟指控  
被詐受累之人亦代剖甚力是該犯陳應麟因  
被詳辦捏款控抵實屬衆證確鑿乃陳應麟明

知罪難免脫妄思拖累一味刁狡堅不畫供查  
例載刁徒直入衙門挾制官吏者發近邊充軍  
又驀越赴京告重事不實者發邊遠充軍又問  
刑衙門審辦案件其有實在刁健堅不承招卽  
具衆證情狀奏請

定奪各等語此案已革武生陳應麟始則包攬漕米  
直入衙門咆哮公堂迨經審明詳辦復敢挾嫌  
赴京捏控官長賊私重情牽累多人衆證明白

自應按例問擬陳應麟除攬納漕糧多科費用  
計贓罪止滿杖其直入衙署挾制官吏亦罪止  
近邊充軍各輕罪不議外應照驀越赴京告重  
事不實例發邊遠充軍到配杖一百折責安置  
該犯實在刁健堅不承招照例請

旨定奪仍於該犯名下將攬得錢文如數追繳分別  
完納給主並照律追罰一半入官武舉潘廷標  
訊無在旁助勢惟一同乘醉入署應與被逼作

抱之劉紹華混行取去底簿之黃騰龍各照不應重律杖八十潘廷標係武舉照例納贖劉紹華等折責發落漕書吳毓蘭邱為高說無浮收情事惟並不善為經理輒與段光奎等爭角究有不合亦各照不應重律杖八十折責草役生員萬里鵬艾品輝楊淩漢訊未為該縣祝壽其致送匾額卽與土儀禮物無異合依饋送土宜禮物受者笞四十與者減等律笞三十俱係生





員照例納贖花戶林光孫等均係畸零小戶因  
被誣騙折錢交納陳覺俚究無包攬漕米應與  
訊無過付銀穀之徐覲堂徐步高均免置議該  
縣陳天爵雖無勒罰銀穀派捐壽資積穀及唱  
戲開筵情事其懸掛匾額出於士民自送亦非  
營私惟不退回究屬不應應請交部照例議處  
仍飭先行回任聽候部議除將全案供招咨部  
外理合恭摺具

奏伏乞

皇上聖鑒勅部議覆奉

硃批刑部議奏

查閱贛州九江兩鎮營伍疏

奏為查明贛州九江兩鎮營伍情形仰祈

聖鑒事竊臣自省起程查閱兩鎮營伍日期業經

奏明在案臣先由瑞州臨江袁州吉安永豐永新

萬安龍泉等營以次校閱至贛州府會同署鎮

李廷鈺將鎮標中左後城守興國等五營官兵

閱看其寧都南安文英永鎮橫岡羊角等六營

路途僻遠循照舊章將官弁調赴贛州考驗兵

丁委員往閱臣回省核辦秋審事竣卽赴九江  
府會同鎮臣施聯科將九江前後水師南康等  
四營官兵閱畢前往南湖饒州鄱湖浮梁廣信  
鉛山建昌廣昌撫州等營逐一查閱該鎮屬之  
武寧銅鼓二營路亦偏僻兵丁委員往閱官則  
調驗臣察看各營陣式隊伍均屬整齊槍炮聯  
絡挑牌對械亦尚便捷兵丁並無老弱充數弓  
自六力至十力不等步箭準頭每兵十名各射

五矢中靶合式在五六名以上至七八名不等  
鳥槍中靶亦在七八分內有材技出色者臣卽  
當場獎賞記名拔補其生疎軟弱者分別懲辦  
各將弁年力漢仗均皆壯健臣視其本身騎射  
之優絀叅以所管兵技之短長酌加獎勵存記  
並勒限練習其把總外委內間有年老技疎庸  
劣之弁另行咨部勒休革退以示勸懲伏思江  
西兵力素弱臣惟有嚴飭各將領督率備弁勤

加操演務期一律精熟以冀仰副

聖主整飭戎伍之至意再各營軍裝器械點驗無虧  
馬匹臚壯足額沿途塘汛墩臺俱尚完整臣至  
廣信府境內順道履勘封禁山林因正值大雨  
之後山水漲發橋梁道路多有淹斷山內低窪  
之處盡成大壑未能前進臣卽在此山口外察  
看地方安靜並據廣信府銘愐面稟先經該府  
赴山週歷查勘並無匪徒潛匿砍木燒炭等弊

臣仍嚴飭該地方文武員弁遵照章程隨時實力巡查不得稍有疎懈臣現於五月二十二日回省所有閱過贛州九江鎮屬各營官兵情形理合恭摺具

奏伏乞

皇上聖鑒奉

硃批知道了

審擬定南廳民吳杰甫等京控疏

奏為遵

旨審擬具

奏仰祈

聖鑒事竊照贛州府屬定南廳民吳杰甫以黎成瑞等拜會傳徒將伊弟吳登階刼殺僅獲頂兇並未拘夥追賊等情控經都察院具奏奉

旨此案着交成格親提人證卷宗秉公嚴審按律定



擬具奏原告吳杰甫該部照例解往備質欽此並  
准將吳杰甫咨解到江當經前撫臣成格飭發  
南昌縣撥差看管一面飭提人卷解省審辦因  
吳杰甫患病取保醫治無效身故經縣驗詳旋  
據吳杰甫之弟吳庭甫投審堅不輸服其姪吳  
兆華復以刑迫縱匪等詞開列吳庭甫之名自  
作抱呈控經都察院遞回歸案訊辦先據定南  
廳查明黎成瑞等並無節次拜會情事取有地

隣人等供結又吳杰甫詞內指稱會匪張四秀等一案業已照例詳辦咨准部覆其另單所開黎成瑞等被控各案或係牽累已經訊結或並無被控案據臣恐贛南一帶或實有匪徒結會滋擾復密委妥員前往該處確查據覆贛南地方界連閩粵向有匪徒藉稱添弟會卽三點會傳徒斂錢內有帶刀防身者民間卽指為千刀單刀及紅蓮等名目以彰其惡並非匪徒自立

會名近年屢經懲辦俱已斂跡查無會匪潛匿等情並據吳庭甫呈明吳登階係被黎丁香毆死並非劫殺經委員審供由司解勘前來臣提集逐一研鞫緣吳杰甫並其弟吳庭甫吳登階均與黎成瑞等隣村熟識吳庭甫曾於嘉慶九年因黎生瑞等盜砍山樹捕毆黎生瑞身死擬絞緩決減流在道會

赦減徒發配限滿釋回道光四年三月二十六日吳登

階遇見黎生瑞等弟侄黎成瑞等扒拾柴草稱  
係賊人弟侄致相爭鬪吳登階先被黎三華等  
及黎成瑞黎升古各拾細石並木扒擲毆致傷  
復被黎丁香奪刀戳劃殞命屍兄吳杰甫報經  
前署廳殷思濂詣驗獲犯訊認將黎丁香擬絞  
監候黎成瑞杖責解經前撫臣成格覆審

題准部覆黎丁香旋於五年八月十二日在監病  
故又據驗報詳咨吳杰甫因與黎姓釀命有嫌

吳登階常販布疋心疑被黎姓挾嫌刼布殺害  
前向族人吳蛟瑞告知並向商借經管公祠銀  
兩以作訟費吳蛟瑞不允斥阻吳杰甫不依砌  
詞控廳並以吳蛟瑞袒護外人一並牽告獲訊  
案內之黎幅慶據供聽聞黎丁香等奪獲零布  
存在黎老六家內質之黎丁香等堅不承認復  
詰黎幅慶稱因畏累妄供並查明黎老六家實  
無寄存零布吳杰甫控經府道臬司批飭訊究

嗣吳蛟瑞路遇吳杰甫斥其不應誣告吳杰甫  
愈懷嫌怨屢次強牽吳蛟瑞猪牛並砍伐山木  
控廳差拘吳杰甫不敢回籍起意赴京呈控因  
南贛向有會匪卽指黎成瑞等拜會傳徒並因  
黎幅慶先曾妄供聽聞黎丁香奪獲零布寄存  
之語以為吳登階被劫布疋殺害又因向刑書  
陳家俊索抄吳登階命案詳稿不允口角有嫌  
並指陳家俊係會中頭目砌詞赴都察院呈控

奏奉

諭旨發回審辦吳杰甫旋值患病取保身故其弟吳庭甫外回投審因命案見勸要證吳雙四等未到咨部展限後據獲解吳雙四供無刼布情事吳庭甫亦卽照供解司提審吳庭甫仍行翻異飭審比有吳登階之子吳兆華因伊父命案既累長伯吳杰甫京控病故次伯吳庭甫又羈訊不釋卽照原控情節添砌委員等刑逼弊害等

情以吳庭甫之名抱呈復赴都察院呈訴遞回  
查審並據吳庭甫自行呈明訊據各供不諱嚴  
究黎成瑞等並無拜會刼殺情事不特取有地  
隣人等供結可憑且據吳庭甫等供係吳杰甫  
妄告至吳登階係被黎丁香共毆傷重致死並  
無刼布別情亦有吳雙四等在場證見似無疑  
義查吳杰甫呈控黎成瑞等刼殺拜會均屬重  
情今審係虛誣自應照例問擬吳杰甫合依驀



越赴京告重事不實發邊遠充軍例發邊遠充  
軍業已病故應毋庸議吳庭甫先經外出不知  
伊弟吳登階被傷情由因伊兄吳杰甫控告不  
前懷疑狡執旋據自行呈明與扛幫為從不同  
應照不應重律杖八十吳兆華因吳庭甫羈訊  
不釋卽照吳杰甫控詞赴京續控並非自行妄  
訟惟添砌委員刑逼各情卽屬申訴不實應照  
律杖一百黎三華前曾拾石擲傷吳登階應照

餘人律杖一百各折責發落黎成瑞訊無拜會  
劫布情事其致傷吳登階已於原案問擬滿杖  
吳蛟瑞並未糾串劫殺與刑書陳家俊均無拜  
會傳徒情事應與干證吳雙四等俱毋庸議吳  
杰甫因病身故看役並無凌虐情弊亦毋庸議  
吳杰甫所牽吳蛟瑞猪牛並砍伐山木身死勿  
徵逸犯黎升古等飭緝獲日另結除將全案供  
招咨部外理合恭摺具

奏伏乞

皇上聖鑒勅部核覆施行奉

硃批刑部議奏

請 旨酌改知縣通判疏

奏為知縣通判缺分繁簡今昔情形不同請

旨酌改恭摺仰祈

聖鑒事竊照設官分職必須因地制宜如有今昔情  
形迥殊自應酌量更改期於地方有裨臣等伏  
查江西贛州府屬之信豐縣係繁難二項部選  
中缺近年以來戶口繁增民俗强悍催科不易  
訟案尤多且界連粵東常有結拜匪徒更須隨

時整頓實於通省中缺內最為難治之區歷次  
部選及本省畱補多係初任人員辦理每形竭  
蹙必得在江年久熟悉地方情形者始克勝任  
應請將信豐縣改為繁疲難兼三要缺在外揀  
調以收駕輕就熟之效至信豐縣既已改繁例  
應查缺改簡以符銓政臣等於通省繁要知縣  
缺內逐加察核無可互改惟查臨江府屬樟樹  
鎮通判原係簡缺駐劄府城後因樟樹鎮地方

商賈輻輳習尚浮囂於乾隆三十年間移駐彈  
壓定為衝繁難三項要缺在外揀調現在風氣  
日歸淳樸稽察較易應請將樟樹鎮通判改為  
衝繁二項中缺歸部銓選足資治理似此一轉  
移閒繁簡既各得其宜而於地方政治亦均有  
裨益臣等溯查乾隆四十七年曾以南昌府選  
缺同知改為外揀繁缺廣昌縣要缺知縣改歸  
部選簡缺經部議准在案今以信豐縣與樟樹

鎮通判繁簡互改事同一例並據藩臬兩司會  
詳請

奏前來合無仰懇

聖恩俯念信豐縣缺繁要准與樟樹鎮通判繁簡互  
改期臻實效如蒙

俞允此二缺現任人員應否更調再行酌核辦理臣  
等往返札商意見相同謹合詞恭摺具

奏伏乞

皇上聖鑒勅部議覆施行奉

硃批吏部議奏



動欸代造直隸二限撥船疏

奏為動欸代造直隸二限撥船恭摺仰祈

聖鑒事竊照直隸應造商捐撥船一千五百隻江西  
分造七百五十隻所需船價運腳銀兩經直隸  
督臣奏奉

上諭著照案先在藩庫籌欸辦理作正開銷等因欽  
此當卽行司欽遵將動欸代造初限船二百隻  
並造竣起運各緣由先後恭摺

奏報在案茲據布政使繼昌督糧道孔昭虔會詳  
稱查本年應造二限船二百隻每船工料應照  
舊章估報銀二百七十六兩零內應內銷銀共  
銀四萬六千八百一十三兩請於司庫道光八  
年地丁銀內動支事竣造冊報銷又外銷共銀  
八千五百四十兩亦查照歷次奏定成案於道  
光八年稅契項下暫行借墊由州縣分年公捐  
還欸等情詳請具

奏前來臣覆核無異除飭司道督率承造之員領  
銀興工不任草率偷減依限完竣解直備用外  
理合恭摺具

奏伏乞

皇上聖鑒奉

硃批依議妥辦

請 陛見疏

奏為恭懇

天恩俯准

陛見事竊臣於上年七月恭摺奏請入

覲欽奉

硃批明歲秋間再行奏請欽此伏念臣疊蒙

簡畀忝任封圻未効涓埃彌殷悚惕自道光四年九

月瞻仰

天顏已逾三載現在江西地方安靜別無緊要事件

謹再叩懇

恩施准臣

陞見俾得親聆

訓誨敬謹遵循如蒙

俞允一俟文闈監臨武闈考試事竣可否將巡撫關

防交藩司繼昌護理臣卽趨赴

闕廷感沐

天恩益無既極所有微臣依戀下忱理合恭摺具  
奏伏乞

皇上聖鑒訓示奉

硃批著來見

查明更正疏

奏為查明更正恭摺仰祈

聖鑒事竊照永新縣歷任挪墊無着民欠並短交捐  
雜各欸銀兩前據司道酌議追賠歸欸當經臣  
據情恭摺奏蒙

恩旨挪缺銀兩着於歷任經徵挪抵各員名下按在  
任月日追賠叅革病故人員照例知府分賠五成  
巡道藩司各分賠二成巡撫分賠一成其短交捐

雜各員率多叅革病故著一併於各上司名下分  
賠歸款等因欽此行司欽遵今據布政使繼冒詳  
稱前任永新縣知縣郭元揆楊齊允明秀祝慶  
譽徐作楷等共短交捐雜各款銀三千九百八  
十七兩零均係應還縣庫之項與厯任墊解民  
欠挪缺正項不同自應在原欠各員名下咨追  
將來無着由本省自行籌補前議一併歸於上  
司名下分賠殊屬舛錯據實檢舉呈請



奏明更正並請將該司交部議處等情前來臣查屬員虧挪正項倉庫無着厯由上司分賠至短交捐雜各款例無上司分賠之條前請一併歸各上司分賠實有未協茲據該司查明檢舉臣不敢因業經奏蒙

允准在前稍涉迴護所有永新縣厯任短交捐款銀兩應請先於原欠各員名下咨追如果無着由本省另行籌補臣與藩司繼昌先未詳查明確

實屬疎忽相應請

旨交部分別議處為此恭摺具

奏伏乞

皇上聖鑒訓示奉

上諭韓文綺奏永新縣歷任短交捐雜各欸誤請並  
歸該管上司分賠查明更正一摺江西永新縣歷  
任挪墊無着民欠並短交捐雜各欸銀兩前經該  
撫奏請將追賠無着銀兩一並歸於各上司名下

分賠歸欸茲據該撫查明郭元揆等短交捐雜各  
欸銀三千九百八十餘兩與歷任墊解民欠挪缺  
正項不同將來咨追無着應由該省自行籌補不  
應並歸該管上司名下分賠據實奏明更正着照  
所請此項短交捐雜各欸先於原欠各員名下咨  
追如果無着該省另行籌補歸欸韓文綺暨該藩  
司繼昌前此未經詳查率行具奏實屬疎忽着交  
部分別議處

拏獲販私拒捕要犯疏

奏為拏獲販私拒捕鎗傷官兵要犯審擬具

奏仰祈

聖鑒事竊據清江縣知縣張湄稟報臨江營都司張  
見坐船在新淦縣坑口地方見有私鹽船一隻  
出船喝拏被鹽犯點放鳥鎗拒傷並傷兵丁郭  
逢春水手郭老妹疾駛逃逸會同各縣營追至  
豐城縣前港河下拏獲蕭中霞等四名同鹽船

烏鎗又另獲鹽犯羅學祚等十名鹽船二隻並  
烏鎗尖刀共獲鹽四萬九千餘觔押解回縣究  
出蕭中霞卽係放鎗拒傷官兵首犯並續獲熊  
恒發一名稟解來省飭司委員審辦茲據該委  
員等審擬由兼署臬司糧道孔昭虔鹽道齊嘉  
紹審解前來臣親提研鞫緣蕭中霞籍隸信豐  
縣與已獲同縣人劉貴仔熊恒發劉秀魁均受  
雇在未獲之楊老四船上幫做水手道光七年

十二月內楊老四在贛縣攸鎮地方攬載生意  
有未獲之王全泰王幅池王作周張有萬各買  
私鹽雇楊老四船隻往下游豐城一帶銷售蕭  
中霞與劉貴仔熊恒發劉秀魁因見私鹽價賤  
同楊老四亦各起意販賣獲利陸續向不知姓  
名擔上買鹽四擔及一二擔每擔計重百觔或  
百餘觔共裝船內夾入商民各船乘溜急夜深  
偷過萬安峽江各卡二十六日船至新淦縣坑

口地方適臨江營都司張見由本營放餉後坐  
船回赴峽江鹽卡遇見喝挈經兵丁鈎住船篷  
蕭中霞正站立篷口情急起意拒捕順取楊老  
四船內裝就烏鎗點放傷及都司張見右額角  
等處並將兵丁郭逢春水手郭老妹致傷蕭中  
霞等卽將船撐逃行至豐城縣前港灣泊時有  
已獲籍隸贛縣之羅學祚陳復興各在信豐縣  
買得私鹽三擔半及十擔與未獲各自販私之

賴豆豉老等雇裝周中秋仔船內又已獲籍隸  
贛縣之王大陽保在贛縣買得私鹽五擔與未  
獲各自販私之賴老五等雇裝溫水長生船內  
均往豐城一帶售賣偷過各卡於二十五日先  
抵前港停泊後見蕭中霞等船隻撐至曾據詢  
悉前情該三船內已獲水手蕭桂仔鍾五升仔  
呂二仔王文相劉德貴王海貞火夫劉矮仔藍  
老四均止知情並未販私其時該都司張見被



傷後經失察偷越之各卡員弁查知趕到並飛  
移各縣營堵截追至前港河下同豐城縣營一  
齊圍拏王全泰張有萬並周中秋仔放鎗拒捕  
各兵丁連放排鎗抵禦王全泰等均各受傷與  
王幅池等鳧水逃走隨將蕭中霞等拏獲訊供  
驗明各傷稟解來省審據各供不諱究係蕭中  
霞獨自起意放鎗拒傷官兵並無同謀幫拒之  
人亦非合夥同財積慣興販其羅學祚等鹽船

均係邂逅相值質之兵丁郭逢春等供亦相同  
並於蕭中霞船內起有賬簿載明各犯買鹽數  
目其為各自興販似無疑義查例載兵民聚衆  
帶有軍器興販私鹽若十人以下拒捕傷至二  
人以上者為首斬監候又部民犯罪在官不服  
拘拏逞兇殺害本官已傷者為首照光棍例斬  
決又律載犯無引私鹽者杖一百徒三年受雇  
馱載者杖八十徒二年又例載販賣私鹽數至

三百觔以上不將賣鹽人姓名供出者於應得  
本罪上加一等定擬各等語此案蕭中霞各自  
販私並非聚衆興販惟係私鹽罪犯輒敢不服  
拘拏放鎗拒傷巡鹽都司並傷兵丁水手二人  
殊屬藐法自應照例問擬蕭中霞除販私十人  
以下拒傷二人以上罪止斬候不叙外合依犯  
罪不服拘拏逞兇殺害本官已傷者斬決例擬  
斬立決照例先行刺字劉貴仔等並未幫同拒

捕均係各自販私應仍照本律定擬劉貴仔羅  
學祚陳復興王大陽保販私均在三百觔以上  
合依販無引私鹽律杖一百徒三年該犯等不  
將賣鹽人姓名供出照例加一等各杖一百流  
二千里熊恒發劉秀魁販私各百餘觔均合依  
販無引私鹽律杖一百徒三年蕭桂仔鍾五升  
仔呂二仔王文相劉德貴王海貞究無販私情  
事其知情聽從船戶幫載均應於受雇馱載杖

八十徒二年罪上減一等各杖七十徒一年半  
蕭桂仔呂二仔業已病故應毋庸議王文相王  
海貞據稱母老丁單及孀婦獨子是否屬實飭  
查取結照例辦理餘俱到配折責安置劉矮子  
藍老四均係船上火夫與水手幫駕不同均照  
不應重律杖八十劉矮仔年未及歲照律收贖  
藍老四折責發落蕭桂仔等提禁取保病故保  
戶訊無凌虐情事應毋庸議管獄官職名並免

開叅臨江營都司張見被拒受傷當卽督率兵  
役將犯追獲應與失察私鹽過卡入境旋即協  
獲之地方各員弁均請免議所有失察私鹽出  
境過境之信豐等縣職名飭取另叅各傷均已  
平復起獲鹽舫船隻分別變價充賞烏鎗發營  
備用尖刀貯庫彙報逸犯王全泰等飭緝獲日  
另結除供招咨部外合將審擬緣由恭摺具  
奏伏乞

皇上聖鑒勅部核覆施行奉

硃批刑部速議具奏

遵 旨傳詢疏

奏為遵

旨傳詢具奏事竊臣於九月二十八日戌刻接到軍機大臣字寄道光八年九月二十日奉

上諭寶華峪地宮浸水情形前據奕紹等向已革監督百壽等究出開通土工時北面壙幫間有石母滴水之處曾經告知英和等商同擋護連日訊據英和供稱地宮地盤開至北面見有似石非石似



土非土幾塊土人謂之石母綿課戴均元俱曾親見伊在工時並未見有水滴嗣經監督告知有時滴水卽與綿課戴均元公同商酌用土擋護等語寶華峪山勢係戴均元首先帶同堪輿相度此地既有石泉當時同往堪輿五人豈無一人指摘及此卽使彼時所看之人並無異議迨開通地盤顯有石母究於風水有無關礙亦應妥為籌議何以直至該監督等告知滴水情形始商同用土擋護

彼時若不迴護前失卽應據實奏明何以始終並無一言奏及着韓文綺卽向戴均元傳旨詢問務令逐一詳細登覆現仍令奕紹等向在工人員嚴切究訊若戴均元所供與京中所訊各供相符是尚自知其罪若稍有不實不盡卽是敢於欺飾伊自問當得何罪令其據實書叙親供韓文綺卽迅速由驛具奏將此由四百里諭令知之欽此當卽傳戴均元至署將

諭旨內指出各情節令其逐一登覆據戴均元伏地  
碰頭口稱我受

皇上重恩

寶華峪山勢係我相度並無石泉其北面壙幫有  
似水非水處所用土少許一塗卽已不見且在  
寶城之外與風水毫無關礙至我於四年出京前  
到工所見實係乾潔現在有浸水情形實非我  
當日意料所及萬分悚懼只求

皇上將我從重治罪等語並據戴均元書叙親供一  
並恭呈

御覽所有傳詢緣由謹遵

旨由驛具

奏伏乞

皇上聖鑒奉

硃批覽

動欸代造直隸三限撥船疏

奏為動欸代造直隸三限撥船恭摺仰祈

聖鑒事竊照江西分造直隸商捐撥船七百五十隻

所需船價運脚銀兩經直隸督臣奏奉

上諭著照案先在藩庫籌欸辦理作正開銷等因欽此當卽行司欽遵將動欸代造初限二限船數並初限造竣起運各緣由先後恭摺

奏報在案茲據兼署布政司事鹽法道齊嘉紹督

糧道孔昭虔會詳稱二限船隻現催趕造起運  
所有應造三限船二百隻每船工料照舊估報  
銀二百七十六兩零應內銷銀二百三十四兩  
零外銷銀四十二兩零其內銷共銀四萬六千  
八百一十三兩請於司庫道光八年地丁銀內  
動支事竣造冊報銷又外銷共銀八千五百四  
十兩照歷次奏定成案於道光八年稅契項下  
借墊由州縣分年公捐還欸等情請

奏前來臣覆核無異除飭司道督率承造之員領銀興工不任草率偷減依限完竣解直備用外理合恭摺具

奏伏乞

皇上聖鑒內閣奉

上諭韓文綺奏動欸代造直隸三限撥船一摺江西應造直隸三限撥船二百隻據該撫查明每船工料照舊估報銀二百七十六兩零應內銷銀二百

三十四兩零外銷銀四十二兩零其內銷共銀四萬六千八百一十三兩着照所請准其於司庫道光八年地丁銀內動支事竣造冊報銷外銷共銀八千五百四十兩着照歷次成案於道光八年稅契項下借墊由該州縣分年公捐還欸該撫卽飭司道督率承造之員領銀興工毋任草率偷減依限完竣解交直隸備用該部知道



分賠歸欵疏

奏為挪移庫項無完照例分賠歸欵恭摺仰祈

聖鑒事竊照前任湖口縣甄別革職知縣李煦因修

理倒塌倉廩賠補霉變穀石挪移庫項經前護

撫臣鄧廷楨咨部等因由前撫臣阿 審明該

革員挪移庫項除叅後續交並查封省寓衣物

原籍家產變抵外實共未完銀六千三百餘兩

依挪移庫項銀五千兩以上例擬流

奏准部議勒限監追嗣因監追病故咨准部覆行  
令在於該故員家屬名下着追在案今據兼署  
布政司事按察使鄭祖琛詳稱查李煦未完銀  
六千三百六十四兩零嗣於審奏後續據湖口  
縣解繳查封任所衣物變價銀七兩九錢備抵  
外現實未完銀六千三百五十六兩零原籍家  
產業經直隸查明淨盡報部咨江飭查歷過江  
西各任所均無貲財隱寄將未完銀兩酌擬分

賠造冊取結呈送前來臣查已故革員李煦挪  
移庫項短交穀價未完銀兩原籍任所既據查  
明家產淨盡並無貲財隱寄無可追繳自應着  
落該管各上司照例分賠巡撫賠十分之一銀  
六百三十五兩零藩司巡道各賠十分之二銀  
一千二百七十一兩零知府賠十分之五銀三  
千一百七十八兩零分別追繳以清

帑項除分賠細數清冊同各任所查無貲財隱寄

印加各結另行咨部外理合恭摺具

奏伏乞

皇上聖鑒勅部核覆施行奉

硃批該部議奏

審擬圖產謀命要犯疏

奏為圖產謀命審無名分按例定擬恭摺仰祈

聖鑒事竊據安義縣報解縣民高名槐砍傷繼母戴氏身死一案飭司委員訊明已死戴氏並非高名槐之父高賜軒明媒正娶例應凡論照例議擬由司審解前來臣隨提案研鞫緣高名槐之父高賜軒原娶胡氏生有五子長早故三卽名槐五名權胡氏故後繼娶鄒氏無出亦故戴氏

先嫁劉報中再醮吳履和生女瑞秀吳履和於道光三年二月病故時戴氏年已四十有六因姑吳徐氏老邁女又幼穉貧無依靠意欲帶女改嫁高颺軒聞知圖聘戴氏之女瑞秀與幼子名權為童養妻央族人高颺錦並吳徐氏堂姪吳孔章前往說媒並因伊已年逾六旬未便續娶戴氏既愿改嫁亦可隨女過門作伴服侍戴氏與吳徐氏應允吳徐氏令吳孔章為瑞秀立

有庚帖高颺軒言送財禮錢十二千文戴氏並無婚書聘財卽於四年十一月十九日先往高颺軒家瑞秀擇日過門童養高颺軒旋令戴氏伴宿並令高名槐等俱稱為母六年四月間高颺軒病故高名槐兄弟四人遵父遺囑將產業四股均分另有園地二塊港田二分給戴氏養贍令高名槐耕種同爨戴氏因高名槐厭憎瑞秀多食時向吵鬧七年六月初十日分爨十二

日早戴氏鷄隻走入高名槐家高名槐趕逐戴氏斥罵將其鍋鉢砸碎並捧高颺軒靈牌走出聲言赴控高名槐順攜菜刀趕至村外向阻戴氏將靈牌棄地兩手奪刀致被砍劃左右手指左手腕戴氏拚命撲喊高名槐恨其醮婦恃強四顧無人起意致死旣可洩忿又可霸吞代種田地隨將伊父靈牌踏毀用刀連砍戴氏咽喉左右並劃傷右腮腴倒地棄刀欲逃經伊伯高



賜允等聞喊趕至網獲送縣詣驗生傷逾時殞  
命該縣復驗訊報將犯證解省委員研審因戴  
氏之嫁高颺軒並無婚書聘財被高颺軒之子  
高名槐殺死若遽依子殺母論與殺死正名定  
分之繼母漫無區別詳經咨請部示准部咨覆  
戴氏是否明媒正娶應再質訊明確按擬到日  
再議等因茲復委審明確惟屍弟戴昭德等始  
以高名槐平日既稱戴氏為母卽應與殺母同

論堅不輸服迨曉以定例亦無可置辯解臣親  
審供悉前情查高名槐之父高賜軒圖聘戴氏  
之女瑞秀與幼子名權為妻央人專為瑞秀媒  
說因戴氏欲隨女過門連類說及僅令作伴服  
侍又無婚書聘財卽與苟合無異實非明媒正  
娶高名槐等稱以為母亦止勉從父命並無母  
子名分今高名槐將戴氏致死自應依例以凡  
論惟高名槐起意致死時心存圖產戴氏田地

本係該犯耕種卽屬得財害命高名槐除棄毀  
父之靈牌罪止斬候不議外合依圖財害命得  
財而殺死人命者斬決例擬斬立決先行刺字  
瑞秀許給高名權為妻實係明媒正娶戴氏與  
高颺軒旣無夫婦名分瑞秀應仍給高名權完  
娶所有高名槐代種戴氏田地斷歸瑞秀夫婦  
承管除將全案供招咨部外理合恭摺具

奏伏乞

皇上聖鑒勅部覈覆施行奉

硃批刑部速議具奏

據情奏懇疏

奏為據情恭摺仰懇

聖恩事竊照道光六年江西各幫重運漕船借領天津道庫剥價飯米折價共銀四萬二百九十一兩零奏分三年扣還已還初二限銀共二萬六千八百六十兩零本年冬尚應扣三限銀一萬三千四百三十兩零又七年幫丁借領天津道庫及欠交通庫失風米價等欸共銀三萬九千

一百一十九兩零亦經奏蒙

恩准展至道光八年冬分限兩年扣還今冬應扣還  
初限銀一萬九千五百五十九兩零轉行遵照  
在案今據督糧道孔昭虔兼署布政司事按察  
使鄭祖琛會詳稱查幫丁本年應領新運錢糧  
內應扣還江南總局暨天津通濟及融借藩庫  
各欸共銀十萬餘兩江西丁情素最疲乏若儘  
數坐扣深恐辦運無資惟有請將本年冬應行

扣還六年借領天津道庫三限銀一萬三千四百三十兩零又七年借欠天津道濟二庫初限銀一萬九千五百五十九兩零在於司庫內動借解還所借銀兩請自明冬為始分作六年扣還歸欸等情請

奏前來伏查天津道濟二庫銀兩原備北漕墊放之用必須依限解還惟各丁辦運竭蹶所欠各欸力難儘數扣還臣細加體察委係實在情形

合無仰懇

天恩俯念丁力拮据准於司庫內動借銀三萬二千九百九十兩零分別解還天津通濟二庫所借司庫銀兩請自道光九年冬分限六年在於各丁應領新運錢糧內坐扣還欸俾疲丁辦運有資而天津通濟二庫亦不致乏項支放理合據情恭摺具

奏伏乞



皇上聖鑒內閣奉

上諭韓文綺奏幫丁前借天津通濟二庫銀兩請於  
司庫內動借解還一摺江西各幫重運漕船前於  
道光六年該幫丁借領天津道庫剥價飯米折價  
共銀四萬二百九十一兩零除已還初二限銀兩  
外今冬應扣還三限銀一萬三千四百三十兩零  
又七年分借領天津道庫及欠通濟庫失風米價  
等欸共銀三萬九千一十九兩零今冬應扣還初

限銀一萬九千五百五十九兩零茲據該撫查明  
該幫丁本年所領新運錢糧內尚有應扣江南總  
局及融借藩庫等欸若儘數扣還恐致辦運竭蹶  
着照所請准其於司庫內動借銀三萬二千九百  
九十兩零分別解還天津通濟二庫所借司庫銀  
兩着自道光九年冬間為始分限六年在各幫丁  
應領新運錢糧內坐扣還欸該部知道